

Dithero tsa Tirelano mo Kutlwanong

27/2015 Thero ka Sontaga o o bidiwang Rokate, e le ka 10. 05. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Pesalome 66:20, le re: **"A go bakwe Modimo o o se kang wa latlha thapelo ya me, le eseng go ntima bopelotlhomogi jwa ona."**

1. Sefela sa 348 - 316/325

2. Thapelo: A Modimo o o sa latlheng thapelo ya me, le e seng bopelotlhomogi jwa ona mo go nna o lebogwe! Amen

3. Lefoko la Testamente e kgologolo le kwadilwe mo go Ekes. 32:7-14;

Epistolo ka fa thulaganyong ya 2 e kwadilwe mo go 1 Timotheo 2:1-6a;

Efangele ka fa thulaganyong ya 3 e kwadilwe mo go Luka 11:5-13.

4. A go ipolelwe tumelo ya bokeresete!

5. Sefela sa 349 - 317/326

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Johane 16:23b-33, e re: "Ammaaruri, ammaaruri ke lo raya ke re: Fa lo kopa Rara sengwe mo leineng la me, o tla se lo naya. Go fitlha nakong eno ga lo ise lo ke lo kope sepe mo leineng la me; kopang, mme lo tla amogela gore boitumelo jwa lona bo tlale. Dilo tse ke di buile le lona ka diane; nako e e tla e ke se kitlang ke tlhola ke bua le lona ka yona ka diane, mme ke tla lo begela tsa ga Rara ka thanolo. Ka motlha oo lo tla kopa mo leineng la me, mme ga ke lo ree ke re: Ke tla lo rapelela Rara; gonne Rara ka esi o a lo rata, ka lo nthatile, lo bile lo dumetse gore ke tswa mo Modimong. Ke dule kwa go Rara, ka tla mo lefatsheng; ke bile ke tlogela lefatshe, ke ya kwa go Rara.' Barutwa ba gagwe ba re: 'Bona, jaanong o bua ka thanolo, ga o bue seane sepe. Jaanong re itse gore o itse dilo tsotlhe, mme ga go batlege gore motho a go botse.

Ke ka moo re dumelang gore o tswa mo Modimong.' Jesu a ba fetola a re: 'A jaanong lo a dumela? Itseng, nako e e tla, e bile e setse e tsile, e lo tla faladiwang ka yona, mongwe le mongwe a ya ga gabo, lo ntlogela ke le nosi. Fela ga ke nosi; gonne Rara o na le nna. Dilo tse ke di buile le lona gore lo nne le kagiso mo go nna. Lo tla nna le pitlagano mo lefatsheng, mme namatshegang, ke fentse lefatshe.'" Amen.

8. Thero: Phuthego e e rategang, leina la Sontaga wa kajeno le re: Rapelang! ka Setswana. Re tshwanetse go rapela, le go kopa Modimo, gonne re na le tsholofetso gore o tla utlwa dithapelo tsa rona. Jesu a re: "Ammaaruri, ammaarui ke lo raya ke re: 'Fa lo kopa Rara sengwe mo leineng la me, o tla se lo naya.'"

Ke a gopola gore ga go na motho yo o kileng a rapela mo leineng la ga Jesu yo o neng a sa swe. Mme a re gopoleng gore ga diragala ka maleo a rona, re swa ka loso e le tefa ya boleo, jwa me le jwa gago. Rona a re nneng mo go Jesu, gonne ene a re: Fa lo nna mo go nna, le mafoko a me a nna mo go lona, lo tla kopa tse lo di ratang, lo di direlwe. Ka moo Mogomotsi yo o mo go rona o tla re ruta, le go re gakolola mafoko a ga Jesu, Joh. 14:26. Re tla itse thato ya gagwe, re kope tse a di ratang gore re kope mo leineng la gagwe. Tsholofetso ya gagwe e re: "Kopang, mme lo tla amogela gore boitumelo jwa lona bo tlale."

Ga ntse jalo: Jesu o buile ka ditshwantsho. Se sengwe, ke fa ene a ne a sa bue ka setshwantsho, barutwa ba gagwe ba ne ba utlwa, ba re: O bua ka ditshwantsho, gongwe ka diane. Ke a gopola gore le kgang ya loso le tsogo ya gagwe ba ne ba e utlwa jalo. "Nako e tla tla, e ke se kitlang ke tlhola ke bua le lona ka yona ka diane, mme ke tla lo begela tsa ga Rara ka thanolo." Nako eo e ne e ise e tle, fa a ne a bua. Ka nako ele o ne a sa ntse a le mo tseleng ya go bolawa, go swa le go tsoga. A re gopoleng gore Modimo o a re rata. Re lalediwa go ya mo go ona, go kopa mo leineng la ga Jesu, Mopholosi wa rona. Gape go na le kutwlano ya botlalo fa gare ga Modimo le Morwaaona. Gape tsa Modimo re a di bona fela, fa re le mo go Jesu.

Yo o dumelang mo go Jesu o a dumela, gonne o itse, fa ene a itse tsotlhe. A re se ka ra itshwenya ka dipotso tse dintsi. Re dumela mo go Jesu, Mopholosi wa rona. Re utlwile gantsi gore Modimo o a re rata. Re ka ya mo go ona go kopa mo leineng la ga Jesu. Modumedi o tshwanetse go itshwarelela mo go tse tharo tse di latelang:

Sa ntlha ke fa Modimo o nthata. Sa bobedi ke fa Modimo o itse tsotlhe, gape o na le thata yotlhe. Sa boraro ke gore ga re a tshwanela go itshwenyegela ka dipotso tse dintsi.

Ka tseo re dumela gore Jesu o ne a tswa mo Modimong. Jesu o a bosta, a re: A lo dumela jaanong? Ke a gopola gore barutwa ba ne ba araba, ba re: Re gorogile mo leseding. Gape go ka diragala gore go ne go le go iikanya mo mafokong a ba a buileng. Tumelo e re nang le yona e tla tihatlojwa. Go botlhofo go bua gore ke a dumela, mme ga se se se botlhofo, mme botlhe ba ba rapelang mo leineng la ga Jesu ba tla pholosiwa ka go dumela mo go ene.

Ee, ditsala, Jesu o buile mafoko ao, fa letsatsi le ne le setse le phirimile mo bosigong jo a tshwarisitsweng ka jona. Ga sala diura dingwe fela ka nako ele. Moragonyana Juta le masole a ne a tla go mo tshwara. E ne e le bosigo jo a tshwarisitsweng ka jona. Barutwa ba ne ba re ba a dumela, mme ba phatlalala. Mongwe le mongwe o ne a ya go tsa ga gabo. Gape Jesu o ne a sa batle gore ba mo lwele, le e seng go letlela masole go tshwara barutwa ba gagwe. Ba mo tlogela. Ba ne ba sa kgone go dira sepe. Jesu o setse a le nosi.

Le fa go ntse jalo, o ne a bua, a re: "Fela ga ke nosi; gonne Rara o na le nna." Jesu o rata gore re itshwarelele mo go tse a di re boleletseng. O romilwe ke Rraagwe, a dira tiro ya ga Rraagwe. Rraagwe ga a ka mo tlogela, gonne ba mongwe, a re: "Nna le Rre re bongwefela," re Modimo o le mongwe fela. Jesu o ne a gomodiwa ka boammaaruri jo bogolo joo, le fa a ne a le mo khutsafalong mo tselang e e bokete e a e tsamaileng. A na le kagiso mo pelong. Gape o rata gore rona ba re leng barutwa ba gagwe kajeno re nne le kagiso. Tseo ke di buile mo go lona gore lo nne le kagiso. A letsatsi le lengwe o na a re: Kagiso, o tla e ba naya.

A re: Re tla nna le tlalelo, mme re nne le bopelokgale, ka a fentse lefatshe. Jesu o ne a bitsa ba ba mmapoleletseng mo sefapaanong gore ke ba lefatshe, gape a re: ba a buswa, le go laolwa ke molaodi wa lefatshe leno. A re: Ba tla mo tshwara, ba mmogise, ba mmapolele mo sefapaanong, a swele mo go sona, mme ka tseo o fentse lefatshe. Jesu o ne a sa bue a re: O tla le fenya, mme a re: O setse a le fentse ka nako, fa a ne a bua. Ga diragala gore a swe, go bonale gore lefatshe le mo fentse, mme Jesu o ne a nyatsa dithata tsa lefifi, a dira ka thata, a di fenya.

Tsotlhe tsa diragala ka Lwabotlhano. Ga diragala, mme a ipolela a re: "Barutwa ba me, badumedi ba me, namatshegang, ke fentse lefatshe!"

Phuthego, tumelo ya rona e tla bonala, fa re itshwarelela mo mafokong a a builweng ke Jesu. Ga re a tshwanela go boifa lefatshe, gonne Jesu o le fentse. A le fenya a ise a ye mo sefapaanong, a le fenya a ise a tsoge mo baswing. Phenyo ya gagwe ke lohumo lo lo se nang tshimologo, le e seng bokhutlo, ke ya Modimo, Mme rapelang, lo se lape. Tlhomamang mo thapelong, le dise mo dithapelong ka go leboga Modimo. Le rona lo re rapelele gore Modimo o re bulele mojako wa Lefoko gore re bue masaitsiweng a ga Keresete a ke leng mogolegwa ka ntlha ya ona. Paulo o rialo. Amen.

9. Thapelo: Tlayang, re obameleng, re iname, re khubame fa pele ga MORENA, Mmopi wa rona, gonne ke ene Modimo wa rona; rona re batho ba bofulo jwa gagwe le dinku tsa seatla sa gagwe. Amen. Thapelo ya Morena: Rara wa rona yo o mo legodimong ...

10. Sefela sa - - 319/331

A kagiso ya Modimo e e fetang tihaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. M. Mkhabela, ka ngwaga wa 2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.